

每週經課朗誦經文(巴克禮台語漢字)2013/01/13

共同經課 - 1 以賽亞書四十三章一節~七節

1 雅各啊，創造你的耶和華，以色列啊，彼個造成你者，按呢講：你毋使驚！因為我救贖你。我曾叫你的名，召你，你是我的。2 你對水中經過，我的確及你相及佇啲；你經過江河，水的確無淹密你；你對火中行過去，的確無受燒，火焰亦無 佇你的身上。3 因為我是耶和華——你的上帝，是以色列的聖者——你的救主；我已經互埃及做你贖回的價錢，互古實及西巴做你的替身。4 因為我看你做寶貝，做尊貴；閣因為我疼你，所以我互人替你，互列國的人替你的生命。5 莫得驚，因為我及你相及佇啲；我欲導你的後裔對東方來，閣對西方招集你。6 我欲對北方講，放出來！對南方講，莫得拘留！將我的眾子對遠遠導來，將我的眾查某子對地極導倒來，7 見若用我的名來稱者，是我為著家己的榮光創造者，是我所做成，所創造者。

共同經課 - 2 詩篇二十九篇

1 〔大衛的詩〕大權能者的子啊，恁著將榮光、氣力歸互耶和華，歸互耶和華！2 著將耶和華的名所應該得著的榮光歸互伊，用聖潔的妝飾敬拜耶和華。3 耶和華的聲佇水面；榮光的上帝起雷，耶和華佇多多水的頂面。4 耶和華的聲有大氣力；耶和華的聲滿滿威嚴。5 耶和華的聲拍折柏香樹；耶和華拍碎黎巴嫩的柏香樹。6 伊亦互伊越跳親像牛仔，互黎巴嫩及西連越跳親像野牛的子。7 耶和華的聲互火焰分叉。8 耶和華的聲振動曠野；耶和華振動加低斯的曠野。9 耶和華的聲互鹿母驚著來生子，亦互樹林的樹葉落光光。見若佇殿內者，攏講榮光。10 大水氾濫的時，耶和華坐啲做王；耶和華坐啲做王，直到永遠。11 耶和華欲賞賜氣力互伊的百姓；耶和華欲用平安賜福伊的百姓。

共同經課 - 3 使徒行傳八章十四節~十七節

14 佇耶路撒冷的使徒聽見撒瑪利亞已經接納上帝的道理，就差彼得、約翰去in遐。15 in已經落去，就替in祈禱，互in受聖神。16 因為聖神猶未臨到in一人，in只有受洗禮歸佇主耶穌的名若定。17 對按呢給in按手，in就受聖神。

共同經課 - 4 路加福音三章十五節~十七節，二十一節~二十二節

15 百姓啲向望的時，眾人心內啲議論約翰豈採是基督。16 約翰應眾人講：「我用水給恁行洗禮，獨獨有一個比我卡有權能的欲來，就若解伊的鞋帶我也袂堪得。伊欲用聖神及火給恁洗。17 伊的手提簸箕，欲將伊彼場一盡簸，收麥入伊的倉，若是麥香就用袂熄的火燒伊。」21 眾百姓已經受洗禮，耶穌也已經受洗禮。祈禱的時，天開，22 聖神降臨佇伊的頂面，形狀親像鴿仔；閣對天有聲，講：「你是我疼的子，我歡喜你。」